

皇朝文獻通考卷十七

錢幣考

五

乾隆十一年議以貴州餘鉛運至湖廣漢口令各省收買以供鼓鑄貴州總督張廣泗奏言黔省威甯州水城廳等處開採白鉛出產旺盛歲自辦解京局正耗鉛四百數十萬觔之外本省鼓鑄及川省收買又約需一百萬觔計多餘鉛三百萬觔但礦廠衰旺不常請每年額外預辦二百萬觔存貯以備接濟尙有百萬餘觔動藩庫公項銀儘數收

買運至四川之永寧下船抵赴漢口發賣以供江浙等省錢局採辦之用大學士等議如所請從之
臣等謹按黔省各鉛廠於乾隆四年議定二八抽課外餘鉛以一半官收一半聽廠民自售九年復以廠民未能廣爲售銷定餘鉛全數官爲收買自九年以後新開各廠皆照此辦理是年復以鉛觔積產滋盛奏定運往漢口之例至十三年以礦產更旺除解京及黔蜀供鑄并存貯二百萬觔運往湖廣一百萬觔外每年又餘白鉛五百萬觔戶部

議各省見俱開鑄需鉛甚多令仍動項收買添運
至漢口發賣並將鉛本腳費核定價直行知各省
畫一買用尋議定撥蓮花廠鉛二百萬觔福集廠
鉛一百三十萬觔萬福山廠鉛一百三十萬觔濟
川廠鉛二十萬觔天星廠鉛二十萬觔共爲五百
萬觔各廠工本原有多寡不同均勻配算每百觔
廠價一兩四錢八分加以水陸運腳以價銀三兩
六錢六釐銷售所售之銀卽抵還工本十四年以
直隸江蘇浙江福建江西湖北等處每年採買白

鉛止約用二百萬觔無需五百萬觔之多復議定歲以二百萬觔運至漢口合之前議解京各項約需九百餘萬觔之數黔省歲產鉛一千四百餘萬觔除抽課外餘鉛仍半歸官買半聽商賣儘足敷用嗣後至二十四年復以每年收買廠鉛積存福集等廠者二千餘萬觔積存瑪姑廠者三千餘萬觔壅滯不銷久懸帑本若槩由川江至楚恐致擁擠京鉛議開濬省城至平越府河道徑由黔省水程直達湖廣陸續分運鉛觔仍赴漢口發賣通商

其柞子厰黑鉛積存亦多並一體發運

又增四川寶川局爐座鑄錢運往陝西先是四川於乾隆七年以寶川局銅鉛俱係赴滇黔採買路遠費重奏請開採建昌地方之會理州冕寧縣等處銅礦是時錢局已專用川銅十年復開樂山縣等處銅礦議定二八抽課外餘銅半歸官買以供鼓鑄各厰歲可獲銅一百餘萬觔至是總督慶復會同巡撫紀山奏言川銅漸盛多所盈餘而陝省素不產銅制錢日貴欲籌轉移以濟民困請於寶

川局再增爐十五座共爲三十座歲可添錢六萬二千二百串有奇以一半增搭本省兵餉作爲銀八錢二之數所餘三萬一千二百串撥運至陝省搭放兵丁月餉仍易銀歸欸實爲彼此有益戶部議如所請從之

臣等謹按寶川局額用銅觔採自會理州之迤北沙溝二廠冕寧縣之紫古喇廠者每百觔定價銀九兩採自樂山縣之老銅溝廠者每百觔定價銀十兩其白黑鉛皆由貴州採買至十九年以後以

西陽州鉛廠試採有效議定除抽課外半歸官買
每百觔給價銀二兩二錢配搭黔鉛供鑄

又定給工部錢法堂關防工部侍郎三和奏言寶
源局所辦事宜與寶泉局相倣見在兩局監督俱
給有分司關防惟工部錢法堂向未議給請照例
一體補給庶文移稽核各專責成尋議定寶泉局
錢法堂印文係督理京省錢法關防今寶源局錢
法堂應鑄工部督理京省錢法關防以昭畫一
十二年增湖北寶武局爐座令仍鼓鑄大錢先是

十一年以高低二項滇銅將次用完滇省各廠不敷採買銅觔無從接濟未便停爐請收買漢口鎮商銅改鑄每文重八分之小錢仍照大錢之價配餉旣以節省局銅且可冀除盜銷之弊部議令試行一年至是湖廣總督塞楞額奏言官局改鑄小錢與大制錢同價計其工料毀大制錢二千卽可鑄小錢三千盜銷與私鑄弊且相因而起應循照定制仍鑄每文重一錢二分之大錢至所鑄錢文向止議配兵餉每銀百兩搭錢六串五百文各營

散錢有限亦不足以平市價近日漢口商販銅觔甚多若預行給價按月交銅每年買銅四十萬觔配入鉛錫尙可增爐五座爲二十座鑄錢除增搭兵餉之外發交江夏漢陽二縣設立官局按照市價酌減出易於兵民均有裨益俟委員辦運滇銅及官商分交洋銅到日仍搭配鼓鑄戶部議如所請從之

臣等謹按嗣後以滇洋之銅陸續解到卽議定錢局額銅四十萬觔將滇銅洋銅及漢口商銅均勻

配鑄各十三萬三千三百餘觔後以商交洋銅漸次減額於十九年以後歲增買湖南銅十萬觔以補洋銅之不足至二十七年戶部以漢口銅價在十八兩之外較該省所辦雲南大興廠銅定價十一兩金釵廠銅定價九兩者數目懸殊令添用滇銅以節糜費尋滇省議撥寧台山廠毛銅加耗煎鍊揭成淨銅合計每百觔祇需價六兩五分有奇令湖北採買應用嗣是停配漢口銅

十三年復開山西寶晉局鼓鑄先是以山西錢價

昂貴

特諭晉省巡撫將鼓鑄用銅之處悉心籌議尋以購用
銅觔惟有招商承辦議定照從前官商辦銅完帑
之例支銷價直并行知各關免其納稅至是以商
人辦到紅銅五十萬觔并委員採買漢口鉛錫巡
撫準奏請復開寶晉局設爐十座每年開鑄十
二卯用銅鉛錫三十四萬八千觔鑄青錢四萬二
千三百二十四串除去工價等項實存三萬五千
一百七十五串於配給兵餉之外並隨時減價平

賣以資民用戶部議如所請從之

又更定雲南辦銅分路起運之例雲貴總督張允
隨奏言滇省辦運京銅先經議定由尋甸東川兩
處陸路運至永寧交長運官由水路接運至京尋
甸威寧一路每年運正耗餘銅三百十六萬五千
餘觔每百觔需腳價銀二兩六錢有奇東川昭通
一路每年運正耗餘銅三百十六萬五千餘觔每
百觔需腳價銀二兩五錢有奇後因昭通一路係
新闢苗疆馬匹雇募不敷已奏開鹽井渡河道將

東川額運銅內酌分一半改由鹽井渡水運至瀘
州每百觔較昭通陸路節省銀三錢二分有奇復
因威甯一路與黔鉛同運馬匹仍屬不敷奏開羅
星渡河道將尋甸額運銅內酌分一半改由羅星
渡水運至瀘州每百觔較威甯陸路節省銀一錢
八分有奇嗣後自尋甸東川以下遂分爲四路每
路各運銅一百五十八萬二千餘觔歷年辦運無
悞見在滇省開修金沙江直通四川已疏濬完工
舟行無阻請將威甯一路陸運銅觔改由金沙江

之小江口水運至瀘州交長運官轉運京局較之
陸運每百觔節省銀七錢二分有奇俟將來船隻
日增再將昭通一路陸運銅觔悉改由水運戶部
議如所請從之

又開陝西鼓鑄局陝西巡撫陳宏謀奏言陝省錢
價日昂前經部派官商辦交洋銅三十萬觔見已
運到其黑鉛一項業經在本省開採所需白鉛點
錫已委員赴漢口採買請開局於省城西安府設
爐十座錢幕滿文鑄寶陝二字每年開鑄二十四

卯用銅鉛錫六十萬觔鑄青錢七萬二千八百串
除去工價等項實存六萬二千餘串至本省配給
兵餉已有四川每歲協濟錢文向定每百兩搭錢
四串仍照舊例辦理其所鑄新錢應設局聽民易
換以平市價戶部議如所請從之

十四年停雲南撥運廣西錢減省城及臨安府局
爐座雲貴總督張允隨奏言滇省歲運粵錢六萬
二千串前於乾隆七年粵西已請開局以錢文尙
未充裕仍撥滇錢近年以來駄運艱難官民多累

且粵西開鑄已久制錢諒已流通請將運粵錢卽行停止至停運之後雲南鑄額尙可酌減應於省城局減爐十座存留二十五座臨安府局減爐八座存留八座每年已可敷用戶部議如所請從之又禁南洋商船私販銅器浙江巡撫方觀承奏言南洋自雍正五年開禁以來商民皆得前往市易而紅黃銅與銅器皆不在禁例緣南洋地不產銅各船販往者甚多查各省鼓鑄以銅觔爲急務見在東洋之銅運歸內地者甚難不應獨任南洋爲